

SVGA

En conexión cu 60 añ di existencia dia 9 di december 2024



Un tiki di nos historia

STICHTING voor Verstandelijk Gehandicapten Aruba a wordo lanta dia 9 di december 1964 dor di meneer P. Harting, meneer A. de Vries y señora C. van den Berg. Nan a ripara cu tabata hopi necesario pa Aruba tin scol special, pasadianan pa mucha y adulto, centro pa train trabao y cas pa cuida 24/7 pa persona cu un discapacidad intelectual. Nan a traha un plan prome y a cuminsa busca fondonan. Na año 1973 a habri pasadia bibito pin. Scol dun'un man a habri na año 1976. Na año 1979 SVGA a habri un pasadia pa adulto na Brasil mainta y atardi den e edificio di scol dun'un man.

Desde año 1982 tabatin un psicologo na SVGA, año 1985 a cuminsa un sportleider y na año 1986 nos trahado social, cu te actualidad ta den servicio cerca pa nos, a cuminsa na SVGA. E grupo social pedagogico a forma y na año 1993 a amplia cu un logopedista y dos año despues cu un di dos psicologo. Desde año 1985 e asina yama "di tres fase" a habri. Esey tabata encera cu Pasadia Bibito Pin a muda pa Piedra Plat 97A y n'e mesun tereno a habri Pasadia Briyo di Solo pa adulto y Centro Man na Obra cu ta un centro pa train diferente trabao pa adulto. A habri tambe un gymzaal riba e tereno pa por duna atencion na movecion p'e clientenan.

Na año 1988 a realisa Cas Sjabururi unda adultonan vulnerabel por a cuminsa biba y haya cuida necesario mientras den dia ta bishita Pasadia Briyo di Solo o Centro Man na Obra. Na año 2003 SVGA a habri dos apartamento riba e tereno di Cas Sjabururi pa habitantenan mas independiente cuminsa train pa biba riba nan mes. Hunto cu FCCA a logra na año 2008 pa habri e oportunidad p'algún persona bay biba cu guia riba nan mes den e barío di Jaburibari. Na año 2019 a pasa e guia di e habitantenan over pa Fundacion Biba Bou Guia. Na año 2020 Cas Blenchi a habri den cuadro di e "Sociaal Crisis Plan Aruba". Esaki ta duna oportunidad pa brinda un cas pa muchanan y hoben cu temporalmente no por ta cerca nan mayornan. Hunto cu Stichting Ambiente Feliz a habri na año 2021 un Pasadia pa mucha cu discapacidad multiple na Centro di Cuido na San Nicolas. N'e momento aki nos ta duna enseñansa, guia y/o cuida na mas o menos 250 cliente o

alumno diariamente.

Algun reto di SVGA

Den transcurso di tempo SVGA a encontra algun retonan sigur. Desde cu gobierno a cambia e forma di subsidia fundacionnan na 2017, sin cu a caba di rond af e bevorderingen di hopi trahado cu a wordo pidi prome cu e cambio, e presupuesto no ta yega pa dun'e cantidad y calidad di cuida cu nos kier brinda nos clientenan. Gobierno, te awe, no a tene cuenta cu e suma di subsidio cu tin inflacion tampoco. Esaki lamentablemente a resulta den un inkrimping den cuida desde januari 2024 y un caso den corte contra gobierno.

Pa cu clientenan ta mira cu no tin pasadia adecuado p'e adulto mayor cu un discapacidad intelectual na Aruba. Esey ta haci cu p'e famianan ta hopi pisa pa cuida nan familiar y e peso riba e casnan manera Cas Sjabururi y Stichting Ambiente Feliz a bira mas. Tin mester mas trahado den e casnan pa por cumpli cu e necesidad di e habitante y e trahadonan mester di habilidad nobo pa deal cu e problemanan fisico y psikico cu ta bin cu edad halto.

Tin un lista di spera largo pa nos Pasadia Bibito Pin pa mucha y no por a realisa ainda un scol pa voortgezet speciaal onderwijs (VSO) pa nos alumnonan mientras cu nos alumnonan tambe tin derecho pa sigui desaroyo den un ambiente escolar te cu nan 20 año por lo menos.

Exitonan pa nos grupo meta

Banda di e retonan tin hopi exitonan tambe di e ultimo añanan. A logra di habri e cas pa mucha y hoben, Cas Blenchi, cu fondonan di e "Sociaal Crises Plan Aruba". E metodo di "Disciplina Consciente" ta wordo uza den cas pa traha mas miho cu posibel n'e desaroyo di e muchanan. Cu fondonan di samenwerking fondsen y hopi ayudo di comunidad a logra un camber pa cada habitante di Cas Sjabururi. Esaki ta mehora e calidad di bida di e habitantenan substancial.

A cuminsa un cooperacion exitoso cu Stichting Ambiente Feliz na Centro di Cuido na San Nicolas. Akinan hunto nos ta maneha

un pasadia pa muchanan cu discapacidad multiple p'esnan cu ta biba cerca nan mayor y esnan cu ta biba den e casnan di Stichting Ambiente Feliz na Centro di Cuido. Scol Dun'un man a pasa den un trayecto hopi exitoso di mehora calidad door di implementa liñanan di siña y e methodo "Disciplina Consciente".

Ademas desde e aña aki tin un klas special pa vaknan creativo y desaroyo social-emocional y tin lesnan special pa haya conocimiento di e mundo digital. Nos scol a logra bin cu e producto di pesto di calidad halto tambe cu ta rekeri plantacion y trabao di cushina di e alumnonan.

Pa cu productonan cu ta wordo produci na nos departamentonan como parti di e programa di e clientenan por menciona tambe e bunita belanan di centro Man na Obra y e dushi te di Pasadia Briyo di Solo. Pronto lo bin producto nobo door cu nos a cumpra un mashin pa shredder tuinafval pa nos traha gordura (cu ayudos di cedearuba) y tin un mashin nobo pa graveer cu ta duna hopi oportunidad pa productonan nobo. E bendemento di producto ta yuda pa cu fundraising pa gastonan pa nos cliente y alumnonan.

Awor ta 5 aña caba cu RIU hotel ta sponsor fysiotherapie pa nos muchanan di Pasadia Bibito Pin y Pasadia Centro di Cuido, e aña aki nos a amplia esaki p'e muchanan di scol Dun'un man tambe. E donacion aki ta haci un diferencia grandi p'e muchanan di nos y di Stichting Ambiente Feliz. Nos tin cooperacion cu Kooyman y Fantastic Garden unda nos clientenan di Man na Obra ta bay traha den grupo un par di biaha pa siman y Martijn Trading ta trece trabao pa nos clientenan di Man na Obra pa nan traha na nos centro mes. Nos clientenan ta hopi orguyoso di kico nan por nifica pa comunidad door di traha p'e companianan aki. Recien nos scol a ricibi digibord pa tur klas for di e proyecto di gobierno. Esaki sigur lo contribui n'e calidad di enseñansa cu nos ta duna.

Actividadnan pa celebra 60 aña di existencia

Awe dia 6 di December 2024 tin un feria di wega pa nos alumno-, cliente- y habitantenan pa celebra e aniversario di 60 aña. Sin ayudo di comunidad cu a sponsor e dia di awe, Rode Kruis, Ibisa y e sosten di e alumnonan di EPB cu ta voluntario, un dia manera awe no tabata posibel.

Lo tin un fiesta pa trahadonan na december pa gradici cada un pa nan contribucion tur dia pa haci un diferencia den e bida di nos cliente-, alumno- y habitantenan. Hunto nos lo sigui traha pa personanan cu un discapacidad intelectual por desaroya nan mes pa bira mas independiente posibel segun nan capacidadnan.

Gradicimento

Nos ta gradici comunidad di Aruba di curason pa tur e apoyo durante e 60 aña di existencia di SVGA. Sin ayudo di comunidad nos no por a logra di ta unda nos ta awe. E confiansa di nos cliente-, alumo- y nan famia den SVGA ta hopi importante pa nos. Nos ta gradici e esfuerzo di tur trahado pa duna e miho di nan



mes pa nos grupo meta tur dia. Nos ta gradici nos miembronan di directiva cu a haci un tremendo trabao durante tur e 60 aña y danki di curason na tur boluntarionan cu a haci un diferencia. Nos ta gradici prensa p'e sosten durante tur e añanan.

Tur fundacion di Plataforma pa Persona cu un Limitacion pa traha hunto na un meta hopi importante, cu ta inclusion di persona cu un discapacidad den comunidad di Aruba y gobierno pa duna nos e fondonan pa haci nos trabao importante, aunke e fondonan no ta suficiente.

Nos kier menciona algun sponsor cu semper t'ey pa nos cu ta Amsterdam Manor Beach Resort, Renaissance Wind Creek Aruba Resort, RIU Hotels, Metacorps, AAA, Mac Donalds, Bright Bakery, Superfood y Cedearuba y algun persona priva cu semper t'ey pa nos. Pa organisa actividadnan extra nos ta keda depende di compania y personanan priva cu ta willing pa yuda SVGA. Hopi hopi danki na tur compania cu a y ta duna oportunidad na nos alumnonan o clientenan pa nan por mostra kico tur nan por!!

Informacion di banco

P'esnan cu lo kier duna un contribucion pa nos celebracion di 60 aña por haci esaki riba nos cuenta di banco:

Stichting voor Verstandelijk Gehandicaptten Aruba

Adres: Piedra Plat 86-A

Cuenta na CMB#: 91603209

Cada ayudo ta wordo aprecia hopi!

Nos ta invita henter comunidad pa sigui nos riba nos pagina di facebook pa keda na altura di tur desaroyo di SVGA:

<http://www.facebook.com/>

[SVGASTichtingvoorVerstandelijkGehandicapttenAruba](http://www.facebook.com/SVGASTichtingvoorVerstandelijkGehandicapttenAruba)